

Kementerian Pendidikan Tinggi Laksanakan Program Dua Universiti Dua Industri

PUTRAJAYA, 18 Januari – Kementerian Pendidikan Tinggi Malaysia (KPT) akan melaksanakan program Dua Universiti Dua Industri (2U2i) di beberapa Universiti Awam (UA) terpilih mulai tahun ini dengan Universiti Putra Malaysia (UPM) dan Universiti Malaysia Kelantan (UMK) sebagai perintis tahun ini.

Menterinya, Datuk Seri Idris Jusoh berkata, program tersebut merupakan usaha meningkatkan kebolehpasaran, persediaan dan kemahiran pelajar universiti untuk menghadapi alam pekerjaan.

“Pengalaman dalam industri amat penting bagi melahirkan graduan holistik sekaligus mencapai sasaran yang terkandung dalam Pelan Pengajian Pendidikan Malaysia Pendidikan Tinggi (PPPM PT),” ujarnya ketika berucap di Majlis Amanat Tahun Baharu 2016 Menteri Pendidikan Tinggi di sini hari ini.

Majlis tersebut dihadiri oleh warga KPT, Ahli Lembaga Pengarah Universiti, Naib-Naib Canselor, Timbalan-Timbalan Naib Canselor serta Pengurusan Tertinggi UA. Yang turut hadir wakil-wakil dari Majlis Perwakilan Pelajar (MPP) UA, warga Politeknik serta Kolej Komuniti.

Idris juga dalam amanatnya turut menyatakan Malaysia akan menjadi negara pertama yang melaksanakan pengiktirafan dan pemindahan kredit bagi Kursus Dalam Talian Terbuka Secara Besar-besaran (MOOCs) ke arah pendidikan fleksibel.

Menurut beliau berkata Agensi Kelayakan Malaysia (MQA) diberi mandat membangunkan platform MOOCs untuk membolehkan semua kursus MOOCs dari Malaysia dan luar negara didaftarkan dibawah platform itu dan diberikan kredit.

"Pelajar boleh mengikuti pengajian secara fleksibel di beberapa universiti dalam dan luar negara yang didaftarkan dibawah MOOCs dalam talian dan kredit boleh dipindahkan untuk tujuan penganugerahan sijil, diploma dan ijazah," katanya.

Di bawah pendidikan fleksibel yang menjadi tema amanat Menteri tahun ini, beliau berkata MQA memperluaskan pelaksanaan program Akreditasi Pembelajaran Berdasarkan Pengalaman Sebelum (APEL) bagi tujuan penganugerahan kredit yang dikenali sebagai APEL (C) untuk membolehkan pelajar mendapat pemindahan kredit daripada pengalaman kerja.

APEL (C) membolehkan graduan memiliki tempoh pengajian sendiri yang lebih fleksibel, katanya.

Selain itu, Idris dalam pada itu jugaberkata pelajar dari negara ASEAN berpeluang untuk mengikuti program pengajian sepenuh masa di tiga buah politeknik premier iaitu di Ipoh, Shah Alam dan Johor Baharu mulai tahun ini.

"Politeknik menyasarkan pengambilan pelajar luar negara sehingga dua peratus enrolmen pelajar menjelang 2020," katanya.

Sementara itu, Idris berkata Kolej Komuniti akan menerajui projek pembinaan rumah kos rendah menggunakan teknologi komposit dengan kos kira-kira RM20,000.

"Projek perintis sebanyak 50 unit rumah akan dibina di Besut, Terengganu. Tapak sudah dikenal pasti dan kerja asas akan dimulakan dalam tempoh terdekat," katanya sambil menambah pembinaan menggunakan teknologi Sistem Binaan Berindustri (IBS) dijangka mengambil masa selama dua minggu.

-Unit Media UniMAP -